



Волаң верат етшаптаты тадат ястасайт



Хор: msn.com

Хаццам лапатам Россия Президент Владимир Путин Арктика муван улты хоятат удапса тадаң тэдан тудматты ураңан волаң верат етшаптаты партас. Ин кашң регион куцая мосал юр понты па ши верат паты унты туты.

Мет одаңан, Северной широтной ход туңа-цира рупитты питцаты ураңан, Ун Ас шоппи мосал 2025-2029-мет талатан норам воцкаты. Ши порайн Лапатнаңк па Пулцават хоятат сора ёхтаптаты питдат. Йи вош эдты кимет

2027-2029-мет талата постаса. Нялмет, Харпан «Снежинка» нэмпи Международной арктической станция омасты. Ши вер 2026-2028-мет талатан паты унты верты мосал.

Ши тумпийн, Арктика муван улты регионатан 2035-мет тал унты ид рохняпты вутциты хотат эдты хоятат ялап хотата каслаптаты. Щалта хотат омасты, хота лудан хоятат ох сахат улты верытсат. Хота военной хоятат улдат, вошат па куртат хорамаңа, улты щира верты ураңан кашң тал яң миллиард молтас солкува эслыты.

Мойң хоятат па туристат яңхты тахаятан, щутцаты ураңан, ялап хотат омасты, шушидыты юшат талты. Араталан улты куртат, вошат ал хоятат ураңан ямат ат усат. Ши порайн щита елды удмитлат, рупитлат, няврэмлад энмалдат.

Алина Тоярова ханшам потар



Хор: Фёдор Воронов

воша куш мойдаты яңха, куш тохдаң муй карты юш хуват яңхты хопа лэдамта.

Кимет, Пулцават вошан тохдаң хопан яңхты хоятат ураңан ялап аэропорт омасты. Худмет, Харп эдты ялпа верты дохан хатэмиты центр унты машинан яңхты юш талты. Ши вер



Хор: ЯНАО губернатор пресс-служба

Дорогие выпускники!

От всей души поздравляю вас с окончанием школы!

Сегодня для вас звучит последний школьный звонок – такой радостный, и такой трогательный момент. Школа – это фундамент, на котором строится всё здание будущего общества. И Ямал постарался, чтобы ваш фундамент был самым крепким – с современными классами, талантливыми и внимательными педагогами, прогрессивными образовательными программами.

Впереди у вас ответственная пора – экзамены, выбор профессии, поступление в вузы. Пусть знания, полученные в ямальских школах, будут вашей надёжной опорой. Верьте в себя, ведь вы – ямальцы, ваш характер закалён севером, а значит, вы способны преодолевать любые трудности.

Спасибо учителям за вдохновение и родителям за поддержку! Ямал гордится вами и верит, что вы сохраните любовь к родному краю. Успешных экзаменов и доброго пути! Пусть ваши таланты служат на благо Родины!

Губернатор
Ямало-Ненецкого
автономного округа
Д.А. Артюхов

Дорогие выпускники, педагоги и родители!

Поздравляю вас с одним из самых трогательных и значимых моментов в жизни – последним школьным звонком!

Для выпускников этот день символизирует завершение важного этапа и начало новых свершений. Ваши упорство, таланты и трудолюбие, помноженные на заботу учителей и поддержку родителей, стали надёжным фундаментом для будущих побед. Пусть каждый из вас смело идёт к своим целям, сохраняя любознательность и веру в собственные силы!

Особая благодарность педагогам за мудрость и терпение, которые помогают раскрывать потенциал молодого поколения, и родителям, чья любовь вдохновляет на достижения. Ваш труд – это вклад в развитие не только округа, но и всей страны.

Дорогие выпускники! Пусть ваши сердца всегда хранят тепло школьных лет, а следующий жизненный путь будет наполнен яркими открытиями, добрыми людьми и возможностями реализовать самые смелые мечты. Верьте в себя, и у вас всё получится!

Председатель
Законодательного Собрания
Ямало-Ненецкого
автономного округа
С.М. Ямкин

СВО ёх кеша хойдыты хот пуншда

Ай куртат элты СВО хара манам ёх шутчаты ёхи ёхтыдыты порайн, кашц пуш Пулцават вошан хойдыты хот каншлат. Гостиницайт тынаңат, тухал ишан па тэлаңат. Шци вер тунматты ураңан сора кеша хойдыты хот лэщаттыя, округ бюджет элты ох эсалса.

ЕИС «Закупки» сайтан айкел этас, Пулцават вош кушайт щимащ хот лэщатты хоят каншлат.

Велци СВО хара манты хоятата, Пулцават вошан холты хот рупитал. Ядпа этам нэпекан ханшман ул: «Ёхи ёхтыдыты хоятата хойдыты хот, тум хот элты анта шеңк хуван, вет километра лепан ат ул. Айкел маты сыйң пормасат, каврам па потам йиңк маты турпайт тайты. Хольмаң хоят кеша холты таха лэщатты. Кашц комнатайн олты таха, пасан, улас, сох понты шкаф, тумбочка па лэхитыты пормасат улты верэд ул. Овдал томанан лап пентты рахас. Мет сора я хойдыты сыс йи атаң-хатл.

Йи хоята сохаптаты тынал кат щёрас педа нялсот солкувая хойл. Хатл сыс каврам лэтит хулам пуш лэты ураңан, кат щёрас педа хутсот солкува сохаптаты мосал. Тьелд-тохел яңхты машина ки мосал холна хулам щёрас солкува мосмитад.

Ядпа этам нэпек хуват, юш манман хойдыты хот 2025-мет тал етшаты унты рупитал, ал па округ бюджет шци вер кеша эслам охат етшатэл унты.

Зоя Куртямова ханшам потар

Рут ясаң верат нох адамты ураңан

Кимет пуш «Информационные технологии и языки народов России» стратегической сессия Москва вошан манас. Волаң хоятат Яндекс, Сбербанк, федеральной агентство, университетат па институтат, шци тумпийн ясаң пилан рупитты хоятат яха акатсайт. Хус молтас регион элты хоятат ёхтыдысат.

Ямал мув элты шци яңхсат: Светлана Тусида – Овс мув шимлаң мир хоятат верат туңматты департаментан рупитал, ур ясаң шциран улты эксперт; Наталья Вануйто – АНО «Ямал-Медиа» телевидение хоңа Овс мув шимлаң мир хоятат ураңан элтыты потратан кушя ул; Галина Косыгина, ЯНАО Национальной луңтап хотан рупитал. Лув потарсат, муй хорпи верат Ямалан верлайт ясаң шавиты ураңан.

Кашц пуш еңта пасан суран актащитыйн, ал хоятат волаң ант уйтлат, муй элты вер манал па муй тыйл. Ин номас понтса интернет мохты ясаң шавиты вер туңматты. Шцишан, кашц хоят ешаул верытал рут ясаңан ханшты, кутлалаң айкел китты. Ант уйтты ясаңл хоты щащл па ханшда – Яндексан уйтты.

- Ямал доватан няврэм уталтыты 40 тахайн ханты, ур, селькуп, саран ясаң тула;

- 4700 хоят Овс мув шимлаң мир ясаң уталтал;

- 3676 ур ясаң уталталат;

- 761 – ханты;

- 171 – селькуп;

- 92 – саран;

- 58 уталтыты нэ па ху.

Там уйтантопса элты каматса ясаң Наталья Тэрковна Вануйто ястас: «Кат хатл сора манасат. Там сессия шимлаң мир хоятат яңмет тала постаман ул. Ин искусственной интеллект пилан кашц пуш уйтантылув, хошты хоятат кутлалаң рут ясаңан ханшлтантылат. Кашц регион ун рупата верал Яндексан рут ясаңл елды хатлатан мошатты уранан. Тухлат 100 щёрас предложений масат, щит олаң ят. Актащам хоятат потарсат, муй хорпи верат



Хор: dkmns.yanao.ru

там верты рупатайн яма манлат, муй хоңа па тахрамтылат. Ямал велци там рупатайд питшалды. Шеңк, лулан, ям ус, хун рут ясаң СМИ там рупата я пилтащсат. Ванты, муң хоңаев ар ям потар акамман ул. Корпус верты порайн шеңк, лулан, нётас. Куш ур ясаң, куш ханты ясаң.

Щита ма потарсам, муй хорпи рупата АНО «Ямал-Медиа» хоңа рупитты хоятат верлат, куш газетайн, куш телевидение, куш подкастат хоңа. Лингвистат, программистат ястасат, лув ант тайлат тамащ ханшам па нэхты хоран элтыты потрат.

Муң округеван ар хоят, хой лув рут ясаңл самаңа тайдалды па елды шавиты, туты лаңхал. Шци хоятат ищи мосал там рупата верты порайн вохты. Рупата щикунш лаварт, туп муң ялап мутрайт онтасан ясең шавиты верытлэв».

Аллина Тоярова ханшам потар

Айлат ёх уйтантопсая вохлайт

2025-мет талан щёхар тылащ 27-29-мет хатлатан Южно-Сахалинск вошан Межрегиональной форум верда. Якты, арыты, нараслыты, каш верты, хорам сохат ёнтты па рут ясаң шавиман елды туты айлат ёх щита яха актащлат.

Нядхошъяң тал элты нялъяң педа вет тал унты Овс мув шимлаң мир айлат ёх, маты отат тусаңа верантты, каш альты, якты па арыты хошлат тохи пилтащты верытлат.

Уйтантопса порайн арсыр еңта пасанат, каш альты па потар туты харат, творческой лабораторияйт лэщатлайт. Владимир Михайлович Санги сэма питам



Хор: cultsakhalin.ru

хатлаң элты ярсотмет талаң па Елена Алексеевна Бибикина ярсот педа ветмет талаң постаты

ураңан, «Йи мув – арсыр потар сый» рут ясаң шавиты вер конференция манал.

Сахалинской областной шоши ёх верантты хот каш верат туты па йис пора нэпекат шавиты Сахалинской мув сыл Министерствайн нётман там айлат ёх акатты форум лэщатлат. Уйтантопсаел «Нунэ» нэман понтсэл. Нивхи, уйльта, нанайцы па эвенки, щита улты ёх нэмлаң олаң буквайт элты там ясаң тыйс.

Хой номас тайл уйтантопсая яңхты, ocnt.sakhalin.gov.ru/glavnaya/d... сайтан положение нэпек луңтаты па уйт дор тылащ олаңмет хатл унты clsk.ru/3LvdxF там ссылка хуват заявка китаты.

Зоя Куртямова ханшам потар

Хул велты ёх пидан уйтантад

Ай кер тылащан Ямал губернатор Дмитрий Артюхов арагал мира ясаң китмадан куцаята хул велпаслаты ёх пидан уйтантагы партас. Профильной департаментата мосал яха пидтащты па нопталты панат хуват яңхты. Артадаты, муй хорпи нётосайт лувилала мослат.

Ши верты вер иса яха акагты па туңа-шира номас понман мосты нэпека лэщатты мосал. Там мохилув атаң-хатад потам йиңкан полщемилат, хул велпасладат. Куш вот, ищки, ерт – щиты ши рупитлат, молты ох шук щитты ураңан. Маты худэл сахат вуты тынэл

па, щеп лыпийн ант щулятыйд. Ши веран хул маты тын ялпа вантты мосал.

Там яңхасая агропромышленной комплекс хоца рупитты куцайт, Овс мув шимлаң мир хоятат верат туңматты па сайлаты департамент, ямальской парламентан рупитты депутатат лоңксат. Лувилала мосал округ ловатан улты хул велпаслаты ёх рупата харат вантты, щита улты куртаң куцайт пидан уйтантагы, хул велпаслаты мохет па лув хоттэлдал пидан потрэматы.

Хашам лапатаң Находка па 3-4 Пески хоца яңхсат, щитат Тазовской районан улдат. Сот хоят кутан потар манас,

хой предприятияйн рупитал па община щиран ул. Лэрапсэл, муй арат солкувайн там хатлатан хул вуйдыла, щитты охел камн солкувая хойл, камн тал хопдалан нопталдат, квотайт хоты сахат ортыдылайт, муй мосал нови хул аршака йиты ураңан.

«Тамиты хул велпаслаты мохет хоца яңхман ныла, хоты лув улдат, оша понты, муй хорпи нётоса мосал община хоятата па муй хорпи предприятияята. Тамаш уйтантагсайт юпийн, ныты питда, муй рупата муңева тадаң тэдан верты мосал хул велпаслаты ёх хоттэлдат ураңан», – Овс мув шимлаң мир хоятат департамент куца нэ Ульяна Каленюк ястас.

Унт дор тылащ соханты унты кашң нопталты пана куцайт яңхлат. Щишан, нын иса портартаты, ад едамдыаты. Холпат, хопат, мотурат, луматты сохат,

сопекат, посат, нопталты панат сыстапаты вер элты – иса портартаты, машьяйн ад улдаты. Нын улапсайн туп нын элтайн лойл.

Аллина Тоярова ханшам потар



Хор: Альбина Тярлина

Няврэмдан вантман таядан

Каматса хатл хащас няврэмат луң щутщаспа унты. Щишан, няврэмдан вантман таядан, атадан каман ант ат шушилдысат. Мет олаң пуш камн

ки мощатлайт, аңкет-ащет штрафан 500 солкувайн понлайт, ши юпийн ки мощатлайт – сапла аршак ох понда.

ЯНАО хоца региональной за-

кон рупитал, комендантской щёс щёхар тылащ 1-мет хатл элты ай кер тылащ 31-мет хатл унты – 22:00 щёс элты 06:00 щёс унты. Ун кер тылащ 1-мет хатл элты

унт дор тылащ 31-мет хатл унты – 23:00 щёс унты камн яңты рахал.

Аллина Тоярова ханшам потар

ОБЪЯВЛЕНИЕ

ВРЕМЯ ДЛЯ ВАЖНЫХ РЕШЕНИЙ

5 000 000 РУБЛЕЙ в ГОД

2 300 000 РУБЛЕЙ ЕДИНОВРЕМЕННО

При заключении контракта **на Ямале**

Подробности на сайте **contract89.ru**

Касапсайн нох питам нэмат ястасайт

Лорвош районан «Память жива. Герои – навсегда в наших сердцах» нёхты хор касапса манас. Волаң Ляльн улам опращлув нумман, ашкулдайн уталтыгы няврэмат па ун хоятат там касапсая лэщатам рупатайдал китсалдал.

Там ванан верам нёхты хорат районной Думаин пирьсайт па нох питам хоятат нэмдал ястасайт.

Олаң, кимет па худмет тахаята этам ураңан мойлапса нэпекат Питлора, Лорвоша, Лоркурта па Мужи воша китсайт. Нэман юкантам мойлапса нэпекқан Овкурта па Ващъёхана мантсат.

Кашң хоят, хой касапсая ру-

пата китыдыйс па нох ант этас, ищи па диплом нэпекан мадайт.

Касапса лэщатам хоятат ун пумаципа ясаң ясталат па па ишан верты касапсаята хоятат па вохлат. Щит шеңк ям, хун аял-унал ияха пидтащман йи вер верлат.

Зоя Куртямова ханшам потар



Хор: Лорвош район Дума



Вул Ляль питам порайна

Там йис энамты няврэмата мосад потарты па ханшты хой лялясас, ёхи ант ёхтас, хой ляль харан век тапас. Любовь Петровна Ендырева муң Овс мувевна яма уйтла. Там иса лувел рахты ясаңат: вератты, арыты, монщты, ханшты нопсаң, вешкат, самаң хоят. Ханты ясаңан Вул Ляль эвалт ханшас, луңталан.



Там пуш нийдъяң тада йис хоты Вул Ляль етшас. Муй арат тад кепа хащад, щи шук пора хун мурэван ёрэмала. Ин там унты эвидална, похладна па хилдыладна номасна шавилайт, самлал хошилат, сэм йиңклар щёрылат, хун Ляль эвалт хулдат па вантлат.

Руц ляль питам порайна,
Вул Ляль питам порайна,
Тащаң хой ки олмал,
Тащад хищман тувал.
Тащад хищман тувал,
Хатэл лайман хищмал.

Руц ляль питам порайна,
Руц ляль питам порайна,
Няврэм хой олмал ки,
Няврэмал хищмал.
Няврэмал хищмал,
Холдаман хищмал.



Емаң пан ки ол,
Тутаң пан ки олмал,
Пан сыд хуват нёхамман,
Холдаман хищмал,
Холдаман хищмал.

Сокащ тадат порайна,
Нил тал хищман юпина,
Нил тал парам юпина,
Нил тал манам юпина.
Германи куль ид питас,
Германи куль ид питас,
Ханты хойен нох дойс.

Ханты хойен так олмал,
Ханты хойен ёр олмал.
Дэрал халща ос па,
Щита парта ёхтас,
Щита парта ёхтас,
Олаң олта питас.

Любовь Петровна ястал: «Ащем ант дытас, ант кашащас ляль эвалт потарты. Тухад ишан моса потар шушиет лавас.

Хор: Любовь Возелова



Ащем Пётр Эндович Ендырев 1942-мет талан ляля вуса. Вер щиты ус: лув Лаборовой куртыя сол ураңан манас, па щи порайн щита ху ёх ляля акатсайт па китсайт. Щилта щи ляля манас. Кирам ухлад щиты щи куртан хащас. Муй сохан ус па щитан щи манас. Лув ханты сохладан щита хув улмал, пора хащман военной формайн миямат. Олаң ёхатмелан уталтасайт пошкан элты орытты, лув щи вер яма хошсалды. Ай пора эвалт велпаслаты яңхас.

Ащем улмална шеңк ант дытас потарты. И порайна потартас, хоты лув мушмалтыса: «Мув уңхат хирты мосал, шанш охан омасман мув хирлув, нох дойты ант рахал. Щиты хирастэв сахат, аңкармасам па шияласам, молты ма лепем мола хататлял. Итта нумасман, щит похатты мутра улмал. Ма вантман тайлэм. Молты порайна сэмлам пентсат. Хомта хуйлам па, щи арат кур калтам шияласам. Отца хуйлам. Калаң калтам вантты хошлам. Тупа нёл тайлад холащ пела уллат, арталаты питсалдам. Па ваңкты питсам. Сэмлам па лап пентсат. Щалта моса пораятан па ма талдайм».

Щиты таңха хотащ госпиталя ёхтаптам. Ин там унты ащем мойлапса нэпеклад шавилдам, хилдыдам элты эталтылдам. Елды улапсаев туңащ ат манад».

Тал худ велты пора етсас

Ямал мувна тал худ велты пора етсас. Ялап тал тыдащ эвалт ун кер тыдащ маса 43 ямальской рыбодобывающий предприятие 930 тонна худ велдас. Лув кутладна алңиц Приуральской район – 222 тонна па Лорвош район – 203 тонна пидна этсадан.

Ши арат худ велты предприятие эвалт мет ямас нийл муниципалитет ропытсат. Лув кутладна Красноселькупской, Ямальской, Пуровской, Тазовской, Надымской районат. Алңиц этсат МП «Аксарковское РПП» – 134 тонна, АО «Горковской рыбозавод» – 121 тонна па ООО «Святогор» – 88 тонна. Мет ямас – панниң, емаң худ па ловның велса.



Хор: Красный Север

«Худ велты ях сәңк щёкат ропата верлат. Тунял эвалт вантман, тампус емаң худ хо-

лам пус артан велса, щит вул йиңк онтасна, худ артан лоңас», – Ямал мув агропромышленной

комплекс департамент коща лаңкар ның Любовь Охман лавас.

Муң хоцев кат худ маты таха ропытл, щит ООО «Пулцават комбинат» па ООО «Норд-Регион», щидта сахат мули лэщатам худ нэңхэт пасанат элты питл па округ томпына манл.

Итта худ велты ях луң педа лэщатылат: пондал па хаплад лэщатлат.

Тамхатл Ямал мувна худ велты тахайна саткем рыбодобывающий па холамхоцъёң перерабатывающий предприятие ропытл, щита кат щёрс кем нэңху ропытл. Хыщам вет тал сыс 10 щёрс тонна молтас худ велса.

Тынаң кев сытта питлат

Ямал мув па челябинской комбинат йи ёр понман Кев пунста питлаңан. Мув хуват яңхты нэңхэт ораңна ёсат лэщатта, Кевна кансантман тайты йилап технологияйт верта па ласкам муват сыстамтта – щимащ проектат Ямал мув Челябинской электрометаллургической комбинат пидна яспасна понам нэпек онтасна этлат.

Яспасна амтам нэпек 2028-мет тал маса ропытта питл. Ши онтасна Харп похална йилап инфраструктура этал. ЧЭМК предприятие Полярной похална 21 ласкам хат хощ ласытл па мув сыстамтал.

«Муң орцевна сәңк ям, йилап йиты талат Кев социальной па экологической щирна энамта питл. Муң региону ши район хоща сәңк вул номсат тайл – дытлу, щита олты нэңхэт олапсэл мет ямми ат йил», – Ямал губернатор лавас.

ЧЭМК мули камантсы тал «Центральной» месторождение хоща руда сытл, тунял эвалт па «Западной» месторождение хоща ропытта питсат. Ши кат таха яха понман, 5 млн тонн тынаң кев сытты вер ол.



Хор: Вера Лонгортова

Ведащ сэмна питам нявремиет ораңна

Приуральской район Зелёный Яр похална ныңат йи ёр понман ведащ сэмна питам нявремиет ораңна ар талды йис хоты носкайт, мидат па пархат сэвлат.

Ай нявремиет мет алаң ертъяң тыдащ энамты талдална, курпатлад мет такан энамлат, щитна ермат па ай уң тайты носкет лувилал тайта ант рахал. Леккарат лавты ясаңна, няврем йи талалды йитал маса, курпатна ивейна мала ки тайта масл. Щитна ал сохам эвалт сэвты лэпат носкайт, лувилал сәңк курна рахлат.

Зелёный Яр ныңат тал ищкетна кас верты хатна ияха актащман лаңкпат, носкайт,



Хор: vk.com/eduard_yaungad

пархат сэвлат. Щиты уйтантыман потар пидна амасман пора сара манл.

Щиты, 2024-мет тална Пулцават ай нявремиет сэмна питты хатна 1450 няврем сэмна питас, лув эвалтылад 740 ях няврем па 710 ның няврем.

Мет волаң тахайт хуват ван-ёсат лэщатсайт

Пулцават, Новый Уренгой па Ноябрьск васат сарнең сэмна питам хатлат педа, нэман верам мет волаң тахайт хуват ван-ёсат лэщатсайт. Касң ёс щиты верман ол, нэңхэт щидта манман энмам тахайлал ат номлатлат, майдата ёхтам нэңхэт саматна па омщаламан век ат хыщлат.


Пулцаватна нэңхэт 430 курм сосмата веритлат – Ямал мув волаң вул вас щит арат талалды йил. Ловатлна, лэщатам маршрут нийл мет хорам таха алял, «Обдорской острог» эвалт «Полярной круг» стела маса.

Кат энамты вул вас – Новый Уренгой па Ноябрьск, ветъёң талданны йилат. Щита ищи кас верты харат дарпитлайт, Новый Уренгой васна «Путь первопроходцев» лэщатла. Лув васкулет хуват манл па нэңхэт пущци лавалта питл, хой мет алңиц щита ропытта ёхтас. Ноябрьск васна па «Культурное наследие» нэмпи ёс питл, Овс мув нэңхэт олапсы пущци вантта рахал.

Хой ши ёсат хуват манты номасна ки ёхатла, ши ораңна брошюрайт лэщатсайт па вас хуват олты дыты хататна, гостиницайт, тохлаң хап датты хататна понтсайт.

Тащан касдылысат, вой велпасдысат

Хор: Аллина Тоярова



Тата ма Мария Тимофеевна Пырысева элты ханшилдым потрэм пондэм. Лув Ямкурт нэ. Миран иса тетя Катяя айлтыда. Ин талдал ара ювам хоят шеңк шимал хаңас, щипан, кум шиттэван иса щимащ хоятат пидан уйтантылув, потар ханшилдылув.



Хор: Елена Бозелова

Мария Тимофеевна ван хатлап тыдащан 15-мет хатадан 1949-мет талдан тащ хотан сэма питас. Щи пораятан тамащ мелак тал ант улдыдыйс, иса тарам ищкет дойсат. Касдыман иса нюки хотан усат, па атаң-хатл карты кур алдысат. Ащел щи пораятан ёх хоятат пидан иса сахар мохалман яңхилдыйс.

– Удмев хуват иса касдыман яңхусув. Тал порайн вой велдыман па яңхилдысув. Кев унты вудылув пидан онаслув талдыслув. Луң сыс, ванты, щита педнайн шеңк ант иляплайт.

Вулэт сусан хорлайт, щалта тащ хотаң ёх вой велты китыдысайт. Лаңки велты. Щалта ай кер тыдащан вой элты ёхатлүв па нюки хотлүв пидан вуты киллүв. Тэк педа, Суматвош педа касдысув.

Вой велман яңхтэван тащев хоңа йи пастух па бригадир хащилдылған. Тащан улты па худ велпаслаты мохилув хол вой велты китлайт. Лув ёра вудылдан яңхлат. Тухал хоятат па Кев педа китлайт. Худмет бригадир па сойпиты ныкды педа китлайт. План тэкаптаты ураңан хоятат щиты щи китыдысаят.

– Наң ай удмен порайн, молты хоятан мон-

щан моншилдысайн, аран арылдысайн?

– Ащем шеңк монщаң ус. Атаң-хатл монщ монщал – па ант холал. Лув потар тэдые тайс. Куш тайс па, хун Акулина апщем пидан иса кашң пуш ащева партыдысув монщ монщты, лув па муңев ун хоят монщат, ай няврэмата ант монщал. Щипан, монщ волаң ма ант уйтлам. Щи верэм воцкаман тайсэм. Апщем па шеңк монщ хулантты самаң ус. Куш

холща хоят ёхатал, муң хотэва доңтыйл, иса монщты пардалды. Юхат, атэд хащтэван, худдым монщдал потартылды.

– Овкурта, ай удмен порайн, няня па па щир лэтота ал яңхилдысты?

– Ванан удмев порайн, яңхилдысув щи. Щита нянь, лант, сол, саккар, шай лутыдысув. Ляль юпи порайн лэтот ус. Вутан удман, нёхи па худ иса тэдые. Щипан, лэтот тайсув.



Хор: Владимир Айвас

Муң па нык охлытэв порайн, куртан хот ант тайсув. Па хоят, па хоят хотан иса хойдыман усув. Ант торащтыты ураңан, ащем Овкуртан ай хотые омпсас. Щи ай хотыенан тухал порайн хулам хоттэд улдыдыйс. Кашң хоттэдан няврэмат усат – щиты щи усув, хол лэпсув.

– Овкурта па хун касалсаты, иса я ултыя?

– Щит хоты, ма унашак ювмем юпийн касалсув. Ма кат-хулам тал удмем порайн иса тащ хотан яңхусув. Ащем вуды шавиман рупитас. Юхат тащ хот элты нык охалсув, там хатл унты наман щи улдув.

Мет одаңан ащем хот опсыдыйс, хот омасман рупитас. Щалта Аса яңхты питас, нопталты. Асан яңхилдытэдн, ун эвет куртан хайлайт, патан ант вулайт. Ванты, лув картопка харан рупитлат, суса пелка торан сэварман яңхлат. Кум ултыйн, тухал ишан Аса яңхилдысат па нопталты нётыдысат.

– Нын ай удман порайн хота нопталтысты?

– Аканлейман. Катра порайн Аканлейман тэдые хот лойс. Хут-лапаткем тонты хот кашң порайн доңшилдыса. Ин па кат-хулам худ велты ху улдыыл. Кашң верыттал кеман капардыйл, нёхал.

Муң энмам пораван звеньевойт усат. Нопталты панатан хонна йи олтман нопталтысат. Кашң пуш потартысат, хой мата панан там хатл нопталтал. Щи порайн мотураң хоп хонна антом ус, иса довалман яңхусув. Юхат щимащ хопат этсат.

Ащем атаң-хатл нопталтыйс. Алаңсахат ёхи ёхатлат па ид олат. Имет худлал иса нох ванщлалдал, иса содылдал. Щалта икет олтэд элты па Емаң Нёдан дойты дашкупа тулдал, содыям худлал рыбозавода малдал. Яңхты юшел шеңк хув. Ин там йисан, мотураң хопан манман, хонна хув.

(Елды па ул)

Аллина Тоярова
ханшам потар

Емъёхан ики па долмах

(Йис потар)

Йис порайн Ай Аса овты Емъёханан Катра Карвош куртые лепн йи ики худ велпасламан ул. Ипуш лув ёхана яңхал па кат пол пелак щита верал. Имомты хатадн велпаслад ванттыя манал.

Щиңанща йи пунал йиңк элты туп-туп нох талтал, щи арат туңялт сорт худ тохи питмал. Кимет пунал ищи йиңк элты вурайн нох аламал, щи арат ун паннэ худ тохи хоймал. Щимащ велпасн Емъёхан ики худ тэдыена моштал па лэтот нуша иса ант па тайтал.

Хув муй ван кут лув щиты улмал. Па ипуш ищиты пол пелаклад ванттыя ёхатмал. Донщ муй еңк элты пун омасты тахайңалал сыстаптамал. Щалта пунңалал вантман, туп ад ед увалтымал:

– Кай! Тата мосванан щи арат худ велдыдысам, ин худэм па иса антома ювмал!

Щиңанща велпаслад муйдал лув япсыена арталалды, лэщатлалды па ищи тахайңалала омаслалды. Щиталдн ёхи щи шушмал.

Кат муй худам хатл парл па щи худ велпаслада мантал. Тохи ёхатталдн, пунңалал валэмалды: итал элты тал йиңк посыйл па кимет отал элты тал йиңк илды педа щёшийл.

Щимащ вевтам вера питман, ин ики мет такан ед увалтымал:

– Кай! Муң Ай Асэвн амуй худэв иса щи ходас? Мохет молты щирн худ щи велдат па тамащ щёхласаң вер ант па вантлат!

Щи ясаңдал пидн Емъёхан ики тамащ номасн ёхатла:

– Ма-са, велпаслам пуңалдн, еша тахты лавдаслам, мосаң матты долмахан пол пелакналам вантлайңан.

Ин ики пунңалал ищи тахайңалала туңа-



Хор: Альбина Тырлина

щира омассалды. Щалта ёхан рува олдат арталал, хота ямашак ил ханематтыя рахал. Ешаул лувела мосты таха уятмал кемн, ёхи щи шушмал.

Кимет хатадн алаңсахат вуш элты па иса егна яиты вуш унты Емъёхан ики пол пелаклад лавалман ус па нэмомты хоят ший щита ант па моштас.

Худмет хатадн лув па велпаслад лавалтыя манас. Щалта атом турма кердас па вота яиттыя питас. Етна пелка туп-туп яма йис.

Имомтыйн ин икев ялпа питам донщ шихарлаты сый худмас па мет яма рува олаң сая ханемас. Ханятыим лотал элты айлта вантылдыйл па моштал, хоты йи ху ай лаңкар ухал пидн вана щи йил. Тыдащ новийн, ванта, яма ныда, муй щирн тумел олаң пол пелкада ванамас па, такан няхалтыман, щиты щи ястас:

– Ей, щи хорпи каркам митху лэңки тайдам, лув елды лудан ищиты ма хонэм ураңан туңа-щира ат рупитас!

Щи ясаңдал пидан олаң пунал йиңк элты нох талсалды па туңял сортдал донща паркатсалды.

Щалта кимет велпасл элты ун паннэңат нох вулды па мет такан ед няхалтыйл:

– Пумащипа, митху лэңкие, па щимащ ойн Ай Ас Туром



икийн ат мадайн! Ма лудан щи онтасн мет яма елды усам-холсам!


Щимащ ясаңат худман, велпасаң куща вой велты юхлад нох адэмасды па долмахаң карты таяң нёлн юватсалды. Ин долмах самал элты шаңкап нёлн хойла па дойм лотал элты пун дойты омлёпа раканл. Щиты йиңк илпийн щи пентал.

Щиталдн Емъёхан ики пол пелаклад хоша ванашак рахал па туп щиты щи ясталдыйл:

– Я щи, наң каншам отэн тамхатл щи уятсэн!

Щалта ин ики пунңалал ищи тахайңалала омаслалды, потам худлад паннэ сох хирата акатлалды, ай лаңкар ухлада япсыена щитат ил хушлалды па таксар кураман ёхлы педа сора щи шушмал.

Владимир Енов ханшам потар



Хор: Вера Лонгоруова

Хоты ай куртатна олапсы манл

Щиты ки номасман, мала ай курт олапсы пушци йидап ясаң лавта рахал. Касң хатл йи щирна манл: щёс ил лайм хорпи, ныңат хат лыпи ропата вердат, яхат хатхощаңна веемадат, дысдад вантта яңхлат, хой юн педа худ нисыта яңхал. Топ пора порайна йи матгы хатна вул вас эвалт рут хоятдад ёхтыдытәдәна, щи порайна, ищирна манты хатлдад еса па ёс хуват мандат.


Курт олапсы – мет ям олапсы. Щит топ щи порайна мастата рахал, хонты нәңху лув сәмладна сыяладды. Щи порайна топ мастата рахал, холна хыщсат нәңхәт, хой ал, сытам олапсына ол. Па щирна мули олта ант веритта питл.

Зелёный Яр курт Приуральской район педа луңтасл, Пулңават эвалт хутъёң километрайна лайл. Хонты кепа нәңхәтна там пухар курт верты тахайи пирийм. Пад рәп элты, Пулъёхан сыдна, вуты килдан па хорам полхыйи ор сыдна лайл.

Алаңсахат ким эттәнна, сытам, йи паляңсый антам. Товына, хонты холна ланщ хойл, камн нәңху антам. Лув ланщ лалты лаялда, щи порайна щи ар ропата этл, хой хатхощәңд осыта питл, хой картошка аматта, яхат хаплад ләщатта пинтщадат. Яхат холна сәңк вас ёхатты пора лаялда.

Хонты кепа Зелёный Ярна мус хат ос, щи порайна нәңхәт ораңна ропытты тахайт осат: хой мусат вантман тайл, мус посты ныңат, пам сәварсат. Луңан нәңхәт Ас педа худ ведта тотлисайт. Хой хувви манта ант ки дытас, Тайпохална луң сыс осат, щита худ саралсат, рәх ванцсат. Сәңк ям порайт осат. Йттам кепа нәңхәт ал ант олат, дытысук худ веддат, ищиты орна рәх ванцта яңхлат, ведпасладат. Топ похална олман пора айлда манл, ант тәрмадаман.

Вера Лонгортова хансам потар



Хор: Вера Лонгортова

Газета «ЛУХ АВТ»

Адрес редакции: 629003, ЯНАО, г.Салехард, мкр. Богдана Кнуянца, д.1, каб.106 (34922) 4-68-63

E-mail: luh.avt@yamal-media.ru

Учредитель

Департамент внутренней политики Ямало-Ненецкого автономного округа (629008, ЯНАО, г.Салехард, пр-кт Молодёжи, д.9, каб.708)

Газета зарегистрирована

Управлением федеральной службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО 19 апреля 2012 года

Регистрационный ПИ № ТУ72-00558

Тираж 1300 Заказ 0616

Подписные индексы: на год – ПА700, на полугодие – ПР561

№ 21 (1272)

Газета вышла в свет 24 мая 2025г. Подписано в печать 22 мая 2025г. по графику: 16.00 фактически: 16.00

Газета выходит по субботам

Цена годовой подписки 88 руб., в розницу не распространяется

Издатель

Департамент внутренней политики ЯНАО (629008, ЯНАО, г.Салехард, пр-кт Молодёжи, д.9, каб.708)

Отпечатано в АНО «Ямал-Медиа» Юридический адрес: 629003, Ямало-Ненецкий автономный округ, г. Салехард, мкр. Богдана Кнуянца, д.1, каб.106

Фактический адрес: 629007, Ямало-Ненецкий автономный округ, г. Салехард, ул. Чубынина, д.39А

Генеральный директор

АНО «Ямал-Медиа» Зулинова Марья Андреевна

Главный редактор

Яковлева Алла Кирилловна